

TE PUNANGA TIAKI

AKAKITEANGA I TE PATIREIA O IEHOVA



**KOAI MA TE
AU KITE O
IEHOVA?**

TEIA MAKATINI, *Te Punanga Tiaki*, te kangateitei ra i te Atua ko Iehova, te Tutara Ngateitei tikai i te ao katoa e pini ua ake. Te akapumaana nei i te tangata ki te tuatua meitaki e kare e roa atu, na te Patireia o te Atua i te rangi e takore i te au kino ravarai e na te reira e akariro i te enua ei parataito. Te akamaroiroi nei te reira i te akarongo i roto ia lesu Karaiti, tei mate kia rauka ia tatou te ora mutu kore, e te tutara nei aia i teianeie ei Ariki no te Patireia o te Atua. Mei te mataiti 1879 teia makatini te nenei uaia anga e kare e turu ana i te angaanga poritiki. Te aru ra te reira i te aratakianga a te Pipiria.

Ka ariki ainei koe i tetai akakiteanga maata atu me kore i tetai apii Pipiria oronga ua i te kainga?

Aere ki te www.jw.org me kore tuku i taau patiangi ki tetai o nga atereti i raro akenei.

No NU TIRENI:
Jehovah's Witnesses
PO BOX 75142
Manurewa, Auckland 2243

No AUTIRERIA:
Jehovah's Witnesses
PO Box 280
Ingleburn, NSW 1890

No te au atereti katoatoa, akara i te www.jw.org/en/contact.

Kare teia makatini e oko. I orongaia mai ei tuanga no tetai angaanga apii Pipiria i te ao katoa, turuia e te tauturu oronga ua. Me kare i akakiteia atu, no roto mai te au taikuanga Tuatua Tapu i te *Bibilia Tapu Ra*, urianga 1888. Me kua tataia te NW i muri ake i tetai taikuanga, te akaari maira te reira e no roto mai ia i te urianga reo Papaa o te *New World Translation of the Holy Scriptures*.

The Watchtower (ISSN 0043-1087) is published semimonthly by Watchtower Bible and Tract Society of New York, Inc.; L. Weaver, Jr., President; G. F. Simonis, Secretary-Treasurer; 25 Columbia Heights, Brooklyn, NY 11201-2483, and in Australia by Watchtower Bible and Tract Society of Australia, 12-14 Zouch Road, Denham Court, NSW 2565. Periodicals Postage Paid at Brooklyn, NY, and at additional mailing offices. **POSTMASTER:** Send address changes to Watchtower, 1000 Red Mills Road, Wallkill, NY 12589-3299. © 2015 Watch Tower Bible and Tract Society of Pennsylvania. Printed in Australia.

TUMU MANAKO I TE KAPI MUA

Koai ma te Au Kite o Iehova? KAPI 3-7

Koai ma te Au Kite o Iehova? 3

Mei Teaa te tu o te Au Kite o Iehova? 4

Eaa ta te Au Kite o Iehova e Irinaki Ra? 5

Akapeea te Tutaki Anga i ta Matou Angaanga? 6

No Teaa Matou ka Tutu Aere Ei? 7

I ROTO KATOA I TEIA ITIU

Tau i te Pipiria i te Oraanga

Ka Rauka laku i te Tauturu i Tetai ke i Teianeie 8

Tua Oraanga

Kitea e Au Tetai Mea Meitaki Atu i te Oraanga

Mekameka 10

Te tu Pakari i Taito no te Oraanga o Teia Tuatau


Kia Akakore ua i te Ara a Tetai Ke 13

Te Mareka Kore ra Ainei Koe i te Atua? 14

Pauia te au Uianga Pipiria 16



TATAU MAATA ATU I RUNGA I TE INITANETI



PAUIA TE AU UIANGA
PIPIRIA KE

**Eaa te Tamaki o
Aramakito?**

(Tataia i roto i te reo Papaa. Akara i raro ake i te BIBLE TEACHINGS > BIBLE QUESTIONS ANSWERED)

KOPI I TEIA
MAKATINI MEI
RUNGA I TE
INITANETI

Koai ma te Au Kite o Iehova?

“E roa toku kite anga ia Mike. Koia tetai o te Au Kite o Iehova. Inara e umere ua ana au i tana akonoanga. Koai a Iehova? Eaa te tumu kare te Au Kite e akono i te au orote? Te piri ra ainei a Mike ki tetai akonoanga kino?”

—Becky, California, Marike.

“Te akamata anga te aronga i toku ngai i te apii i te Pipiria ki te Au Kite o Iehova, e manako ana au e eaa te aiteanga o te reira ingoa? Tuke rai te ingoa o tera akonoanga!”

—Zenon, Ontario, Kanata.

“Kua manako maua ko taku vaine e te atoro maira te Au Kite o Iehova i te akakeu ia maua kia manako kino no te mea kare maua i aere pure ana. Kua kite maua e mei te mea kare e apinga e kitea i roto i te au akonoanga tumu, kare katoa e kiteaia i roto i tetai akonoanga tuke ua ake rai mei te Au Kite o Iehova.”—Kent, Washington, Marike.

“Kare tikai au i kite e koai ratou e eaa ta ratou i irinaki.”

—Cecilie, Esbjerg, Denmark.

Penei i kite ana koe ia ratou e tutu aere ra mei tera are ki tera are, i te ngai tangata, te tu’a tu’a anga i te au puka Pipiria e te oronga anga i te au apii Pipiria kare e tutaki. Penei kua oake mai tetai ia ratou i teia makatini kia koe. Noatu ra, ka manako koe e koai tikai te Au Kite o Iehova. Penei e aiteite toou manako ki tei taikuia i runga ake nei.

Me e au uianga taau e te manako mei teia rai, ka kimi koe i te pauanga kiea? Akapeea koe e kite ei eaa tikai ta te Au Kite o Iehova e irinaki ra, akapeea ta ratou angaanga tutu aere e te au ngai akamorianga te tutakiiia anga, e eaa te tumu i atoro ei ratou ia koe i toou kainga e i aravei atu ia koe i te ngai tangata?

“E maata te au mea taku i tatau no runga i te Au Kite o Iehova i runga i te Initaneti,” i karanga ai a

Cecilie i taikuia i te akamata anga. “Kua rongono ana au i te au koumuumu anga e te au tuatua papaki tai no runga ia ratou. Tei tupu, kua manako tau kore au no runga i te Au Kite o Iehova.” Inara i muri mai, kua tuatua au ki te Au Kite o Iehova e kua mareka au i te au pauanga ki taku au uianga.

Ka inangaro ainei koe i te kite i te au pauanga tika ki taau uianga no runga i te Au Kite o Iehova? Te akamaroiroi atu nei matou kia aere koe ki te ngai tikai e rauka mai ei te pauanga koia oki te Au Kite o Iehova, tei nenei i teia makatini. (Maseli 14:15) Te manakonako nei matou e ka tauturu te au atikara ka aru mai kia kite koe e koai matou, eaa ta matou i irinaki e kia mārama katoa koe i te angaanga ta matou e rave ra.



Mei teaa te tu o te Au Kite o Iehova?



“E maroiroi te [Au Kite o Iehova] i te rave i te mea tau. Ka puapingaia teia aronga noinoi kore i roto i te au angaanga poritiki—inara kare rava ratou e rave i te reira. . . . Te āriki ra ratou i te au mana kavamani inara te irinaki nei ratou e na te Patireia o te Atua e akatikatika i te au manamanata o te tangata.”

—Nutipepa *Nová Svoboda*,
i Czech Republic.

E akaareanga pa enua matou kare i kapiti atu ki te au pupu akonoanga ke. Noatu e tei Marike to matou opati maata i te ao katoa, e noo ana te manganui o te Au Kite o Iehova i te au enua ke ke. Te tika, mei te varu mirioni ia matou e apii ra i te Pipiria ki te tangata i roto i te 230 tuma enua. Ka pera tatou te aru anga i te tuatua a Iesu: “E tutu aerea te evangelia o te basileia nei, e kako rava ake te ao katoa nei; ei kite no te pa enua ravarai.”—Mataio 24:14.

Noatu teiea te ngai e noo ra matou, e aru ana matou i te ture. Inara ka tauta tatou kia vai takake mei te au angaanga poritiki. Te tumu, no te mea e aru ana matou i ta Iesu ikuikuanga no te au Kerititiano “kare kotou i to teianei ao.” No reira kare matou e piri atu ki te au manamanata e te au angaanga poritiki e kare matou e turu i te angaanga tamaki. (Ioane 15:19; 17:16) Te tika, i te tuatau o te Tamaki II o te Ao, kua tiraia te Au Kite o Iehova ki roto i te are auri, kua tamamaeia, e kua tamateia no te mea kare ratou e piri atu ki te angaanga poritiki. Kua tata tetai epitikopo Tiamani no mua ana e: “Ka rauka tikai ia ratou i te karanga e ko ratou anake ua te aronga i patoi kia tau ki to ratou akava ngakau i te tuatau o te Third Reich.”

Noatu ra, kare matou e akatakake ana ia matou mei te katoatoa. Kua pure a Iesu ki te Atua no tana au pipi e: “Kare au i pure ia koe e, ka apai ke atu koe ia ratou i teianei ao.” (Ioane 17:15) No reira, penei ka kite koe ia matou e angaanga ra, e okooko ra, e aere apii ra i toou ngai.

AU ENUA E MAATA TE AU KITE

| | |
|---------|-----------|
| Marike | 1,190,000 |
| Mexico | 800,000 |
| Brazil | 770,000 |
| Nigeria | 330,000 |
| Itaria | 250,000 |
| Tiapani | 220,000 |



Akara i te vitio *Special Convention in Israel* i te www.jw.org, e te akara aka-
peea te Au Kite Iseraela e te Au Kite
Paretaina i te akakore anga i te au tu
ke ke o te iti tangata. (Akara i raro ake
i te ABOUT US > CONVENTIONS)

Eaa ta te Au Kite o Iehova e irinaki ra?

Irinaki te Au Kite o Iehova e “te au tuatua tapu katoa i tataia ra, e mea akauruia mai e te Atua, e e mea meitaki.” (2 Timoteo 3:16) Te taangaanga nei matou i te Pipiria ei aratakianga tau no te apii no runga i Tei Anga mai e kia noo i te au oraanga meitaki.

Te karanga ra te Pipiria: “Kia kite ratou e, ko Iehova toou ingoa, e ko koe anake Tei Teitei i te enua katoa nei.” (Salamo 83:18) No reira, e akamori anake ua ana matou i te Atua ko Iehova, ei Au Kite nona, ka tauta matou i te akakitekite i tona ingoa.—Isaia 43:10-12.

Ei au Kerititiano, te irinaki ra matou ia Iesu, “ko te Tamaiti teia na te Atua,”* tei aere mai ki te enua nei e kua riro mai ko te Mesia. (Ioane 1:34, 41; 4:25, 26) I muri ake i tona mate, kua akatuaia mai a Iesu ki te rangi. (1 Korinetia 15:3, 4) I muri akera kua riro mai aia ei Ariki no te Patireia o te Atua. (Apokalupo 11:15) Teia Patireia e kavamani tikai te reira te ka akaoki mai i te Parataito ki te enua nei. (Daniela 2:44) “Kareka te aronga maru ra, ka noo ia i te enua, e ka rekareka ratou i te maata o te au ra,” i karanga ai te Pipiria.—Salamo 37:11, 29.

Te irinaki ra te Au Kite o Iehova e ka puapingaia te tangata i teia tuatau mei te au kaveinga Pipiria. (Isaia 48:17, 18) No reira, ka aru vaitata matou i te reira au kaveinga. Ei akaraanga, no te mea te akamatakite maira te Pipiria ia tatou kia kopae i te au peu te ka akataero i to tatou au manako e te kopapa, no reira kare matou e kai avaava ana e kare e kai i te apinga akakona. (2 Korinetia 7:1) Ka kopae katoa matou i te au peu te akaapaia ra i roto i te Pipiria, mei te konā kava, te ainga tau kore, e te keikeia.—1 Korinetia 6:9-11.

* Te akataka katoa ra te Pipiria ia Iesu ei “Tamaiti anau tai a te Atua,” no te mea koia te momua tei angaia e Iehova.—Ioane 3:18; Kolosa 1:13-15.



“Me tatau ratou i te Pipiria, irinaki ratou e te tuatua ra te Atua kia ratou. Me tupu ake te au manamanata i to ratou oraanga, ka rave mai ratou i te Tuatua na te Atua e ka kimi i te pauanga. . . . Kia ratou e mea ora te Tuatua na te Atua.”

—Orometua Katorika ko Benjamin Cherayath, Nutipepa *Münsterländische Volkszeitung*, i Tiamani



Kia kite i ta matou i irinaki, te tumu kare matou e akono i te au orote e kare e āriki i te pamu toto, aere ki te www.jw.org, akara i raro ake i te NO RUNGA IA MATOU > AU UIANGA A TE TANGATA.

Akapeea te tutaki anga i ta matou angaanga?



“I te au angaanga pouroa a te Au Kite o Iehova, e tutakiia ana na roto i te moni oronga ua, na te au mema tataki tai e iki te maata e te putuputu o te ‘moni’ ka oronga na te akonoanga.”

—European Court of Human Rights, 2011

I te mataiti tataki tai, e nenei ana e e tu’a ana matou e anere mirioni ua atu Pipiria e te au puka Pipiria. E pātu ana matou e te akaaere i te au opati manga e te au ngai nenei takapini i teia ao. E ngauru ua atu tauatini putuputuanga e aravei ana i ko i te au ngai akamorianga tei kapikiia ko te au Are Uipaanga Patireia. Naai e tutaki ana i teia au mea pouroa?

E tutakiia ana ta matou angaanga na te moni oronga ua. (2 Korinetia 9:7) I te 1879, kua akakite te itiu rua o teia makatini e: “Te irinaki nei matou e ko IEHOVA te turuturu ra i te ‘Zion’s Watch Tower’ [te ingoa mua o teia makatini,] e no teia tumu kare rava matou e **pati-pati** me kore e **pati** i te tangata no te tauturu.” Te turu nei rai matou i teia tukuanga.

E tukuia ana te moni oronga ua ki te au opati manga me kore ki roto i te pia moni i ko i te au Are Uipaanga Patireia tataki tai. Inara kare rava matou e pati i te tuanga ngauru, te ko’i moni, me kore e tiati no te au angaanga e te au puka. Kare matou e tutakiia ana kia tutu aere, kia apii i roto i te putuputuanga, e kia tauturu i te pātu i te au ngai akamorianga. Mei tera te tu kua akakite a Iesu: “E mea o mai ua to kotou, e oronga ua atu oki kotou.” (Mataio 10:8) Pouroa te aronga e tavini ra i ko i to matou au opati manga e to matou opati maata i te ao katoa, kapiti mai te aronga o te Pupu Akaaere o te Au Kite o Iehova, e au mema pouroa ratou no tetai akaaerenga kare e tutakiia ana.

E taangaanga katoa ia ana te moni oronga ua ei tauturu i te aronga tei rokoia e te tumatetenga. Kua reka-reka te au Kerititiano mua i te tauturu i te aronga tei rokoia e te tumatetenga. (Roma 15:26) Te tauturu katoa nei matou i teia aronga na te akatu akaou anga i to ratou are e te au ngai akamorianga e na te oronga anga i te kai, te kakau, e te au vairakau.



Akara i te vitio *Philippines Typhoon—Faith Conquers Adversity* i runga i te www.jw.org. (Akara i raro ake i te ABOUT US > ACTIVITIES)

No teaa matou ka tutu aere ei?

Penei kare atu e angaanga e akataka mai ia matou mari ra ko ta matou angaanga tutu aere—mei tera are ki tera are, i te ngai tangata, e te au ngai ravarai ka kitea te tangata. Eaa ra matou i rave ei i teia?

E tutu aere ana te Au Kite o Iehova kia akakaka i te Atua e kia akakitekite i tona ingoa. (Ebera 13:15) Ka inangaro katoa matou i te akarongo kia Iesu Karaiti, tei akaue mai e: “E teiane, ka aere kotou, e akariro i to te pa enua katoa ei pipi; . . . Ma te apii atu ia ratou, kia akono i te au mea katoa taku i akaue atu kia kotou.” —Mataio 28:19, 20.

Tetai katoa, inangaro matou i to matou tangata tupu. (Mataio 22:39) E tika, kua kite matou e e akonoanga rai ta te maata anga o te tangata e kare te katoa anga e inangaro i te akarongo i ta matou karere. Noatu ra, te irinaki nei matou e ka riro te au apiianga Pipiria ei akaora i te tangata. Ko te tumu teia “te apii anga atu e te tua-tua anga atu ia Iesu Mesia,” mei te au Kerititiano rai i te anere mataiti mua.—Angaanga 5:41, 42.

Te maata anga o te aronga tei tatau i ta matou puka, kare ratou i te Au Kite o Iehova. E mirioni ua atu te apii ra i te Pipiria kia matou, no roto mai i te au akonoanga ke ke. Noatu ra, te rekareka nei ratou e te atoro maira te Au Kite o Iehova ia ratou.

E tika, penei e au uianga ke taau no runga i te Au Kite o Iehova. Te pati nei matou ia koe kia kimi i te au pau-anga na te

- Ui anga ki tetai o te Au Kite o Iehova.
- Aere anga ki runga i ta matou *website*, www.jw.org.
- Aere anga ki ta matou au uipaanga, kare e ko'i moni e e turou mai te katoatoa. ■



Ko Antonio Cova Maduro, e tangata apii i te tu tangata kua tata aia i “te tautanga e te aruaruanga a te Au Kite o Iehova e pou ua atu to ratou maroiroi . . . , kia taeria te tuatua tapu ki te openga o te enua nei.”—Nutipepa *El Universal*, i Venezuela



No tetai akakiteanga no runga i te Au Kite o Iehova, akara i te vitio roa *Au Kite o Iehova—Akaaerea Kia Tutu Aere i te Tuatua Meitaki*, i runga i te www.jw.org. (Akara i raro ake i te AU PUKA > AU VITIO)

Ka rauka iaku te tauturu i tetai ke i teiane



AKAKITEIA E JULIO CORIO

MATAITI ANAU
1981

ENUA ANAU
GUATEMALA

ORAANGA
TAITAIA TE TAMARIKIANGA



Maua ko te taeake tei akono iaku

TOKU ORAANGA I MUA ANA: Kua anauia au i Acul, e taoni mamao i vao ake i te tua opunga o te ngai maunga i Guatemala. No roto mai toku ngutuare tangata i te iti tangata Ixil, e pupu tangata o te uanga Maya. Kapiti atu ki te reo Paniora, kua utuutuia mai au i te tuatua i to matou reo tupuna. I te au mataiti mua o toku oraanga kua na roto au i tetai tuatau kino roa atu i Guatemala i te tuatau tamaki enua e 36 mataiti te roa. I te reira tuatau e manganui te au tangata Ixil tei matemate.

I toku ā mataiti anga, te kanga ra toku tuakana e itu ona mataiti i tetai pomu meangiti tei aruru pu ua. Tei tupu mai mei te reira tumatetenga kua matapoia au, te mea mii ra, kua mate toku tuakana. I muri akera, kua pou iaku tetai tuatau i toku tamarikianga i roto i te ngai o te tamariki matapo i te Oire ko Guatemala, te ngai i apii ei au i te tataanga Braille. I reira, kare rava au i mārama tikai i te au tumu, i kore ei te aronga angaanga e akatika iaku kia tuatua ki te au tamariki ke e kua kopae toku au oa apii iaku. E maromaroa ua ana au e te tapapa atu kia oki ki te kainga no tetai rua marama i te au mataiti ravarai ki toku mama takinga meitaki e te tu tangi. Ma te maromaroa, kua mate aia i toku ngauru mataiti anga. Te manako anga e kua ngere au i taku i akaperepere tikai i teiane ao, kua taitaiaia au.

I te 11 anga mataiti, kua oki au ki toku taoni e kua akamata i te noo i ko i toku tuakana angai e tona ngutuare tangata. Kua akono ratou iaku i te pae kopapa, inara kare e rauka i te akono iaku i te pae o te manako ngakau. Tetai au taime, ka aue au ki te Atua: “Eaa toku metua vaine i mate ei? Eaa au i matapo ei?” Kua akakite mai te tangata kiaku i teia au tumatetenga e e anoano no te Atua te reira. Kua manako mai au e kare te Atua e kea mai ana e e tu papaki tai tona. Te tumu anake ua kare au i tamate iaku uaorai no te mea kare e rauka iaku i te rave i te reira.

Kua riro toku turanga matapo i te akaparuparu i toku tu i te pae kopapa e te pae manako. I toku tamariki anga, kua tupu te ainga takinga kino kiaku i tetai au atianga. Kare rava au i ripoti ana i teia au kino—kare au i manako ana e ka kea mai tetai tangata. Taki tai ua ake taime ka tuatua mai te tangata kiaku, kare ra au e tuatua atu ki tetai tangata. Kua akamamao au iaku uaorai e kua tupu te taitaia, e kare au i inangaro i te irinaki i tetai ua atu.

KUA TAUI TE PIPIRIA I TOKU ORAANGA: I toku mapu ou anga, e rua Au Kite o Iehova (e tokorua akaipoipo) tei atoro mai iaku i te tuatau kangakanga o te apii. Tetai puapii i taku apii tei tangi i toku

turanga, nana i pati ia raua kia atoro mai iaku. Kua akakite mai raua i te taputou a te Pipiria e ka akatua mai tei mate e a tetai rā ka kite akaou te matapo. (Isaia 35:5; Ioane 5:28, 29) E reka tikai au i ta raua i apii mai, inara e ngata iaku i te tuatua kia raua no te mea kare au e matau ana i te tuatua. Noatu toku tu muteki, kua tauta raua ma te tu maru e te akakoromaki i te atoro mai iaku no te apii i te Pipiria. E tere atu i te 10 kiro mita to raua aere anga e na runga atu i tetai maunga kia taea toku kainga.

Kua akataka mai toku tuakana angai i to raua tu mako i te akamanea inara e meangiti ua ta raua apinga. Noatu ra, kua akaari ua mai raua i to raua inangaro iaku, te apai anga mai i te au apinga aroa riki-riki. Kua kite mai au e ko te au Kerititiano mou anake te aronga e akaari ana i teia tu akaatinga.

Kua apii au i te Pipiria ma te tauturu o te au puka Braille. Noatu e te mārama meitaki ra au i taku e apii ra, e ngata iaku i te āriki i tetai au mea ma te ngakau tae. Ei akaraanga, kua ngata iaku i te irinaki e te manako maira te Atua iaku ei tangata e te manako maira tetai pae iaku mei te Atua rai. Kua mārama au i te tumu i toku ua ai a Iehova i te kino kia tupu no tetai tuatau poto, inara kua ngata iaku i te kite tikai iaia ei Metua aroa.*

Ma te aere marie, kua riro taku e apii ra i roto i te au Tuatua Tapu ei tauturu iaku kia tau i toku manako. Ei akaraanga, kua apii mai au e te tangi tikai maira te Atua i te aronga e mamae ra. Karanga te Atua no runga i te aronga e akamori ra iaia tei takino-kinoia e: “Kua akara tikai au i te mate o toku ititangata . . . kua kite oki au i to ratou mamae.” (Exodo 3:7) I toku āriki anga i to Iehova au tu maru, kua akakeuia au kia akatapu i toku oraanga kiaia. I te 1988, kua papetitoia au ei Au Kite o Iehova.

Okotai mataiti i muri ake i toku papetito anga, kua aere au ki tetai apii no te aronga matapo i te pae i te oire ko Escuintla. Kua rongo tetai o te aronga pakari i roto i te putuputuanga i te au akaaoanga taku e aro atura kia tae ki te au uipaanga iaku e noo ra i te kainga. Teia oki te tu, aiteite ua te ngai maunga tei aereia mai e te tokorua Kite no te apii kiaku e ka na reira rai te ara ki te putuputuanga vaiata roa atu, e

* No tetai akakiteanga no runga i te tumu i toku ua ai te Atua i te kino kia tupu, akara i te pene 11 o te puka *Eaa Tikai ta te Pipiria e Apii Maira?* neneia e te Au Kite o Iehova.



Oronga anga i tetai ako ma te Pipiria Braille

e mea ngata te reira noku kia aere. Ei tauturu iaku, kua kiteaia e tetai o te aronga pakari tetai ngutuare Au Kite i Escuintla tei inangaro ua i te apai iaku ki to ratou kainga kia tauturu iaku kia tae ki te au uipaanga putuputuanga. Tae mai ki teia rā, te akono nei rai ratou iaku mei tetai mema o to ratou ngutuare.

E maata taku au akaraanga o te aroa tikai ta te au mema o te putuputuanga i akaari mai. Kua riro teia au tupuanga ei akapapu kiaku e ei Au Kite no Iehova, tei rotopu au i te au Kerititiano mou.—Ioane 13:34, 35.

KUA PUAPINGA AU: Kare au e manako puapinga kore akaou ana ma te kore e manakonakoanga. I teianei e akakoroanga tikai tetai i toku oraanga. Ei tavini tamou i roto i te angaanga apii Pipiria a te Au Kite o Iehova, e akamou ana au ki runga i te apianga i te au tuatua mou Pipiria ki tetai ke kare ki runga i toku turanga pakipakitai. Pera katoa, tei iaku te akameitakianga no te tavini ei tangata pakari i roto i te putuputuanga e te oronga i te au ako Pipiria ki te katoatoa i roto i te au putuputuanga i teia ngai. Tei iaku katoa te akameitakianga i te oronga i te au ako Pipiria i ko i te au uruoanga tapere e tauatini ua atu tangata e tae ana ki reira.

I te 2010, kua oti iaku te Apii Tavini Anga Orometua (kapikiia i teianei ko te Apii na te Aronga Tutu Evangelia) tei raveia i El Salvador. Kua riro teia apii ei akapapa iaku kia akatupu meitaki atu i taku au apainga i roto i te putuputuanga. Kua akatupu teia te renianga iaku kia kite e te akaperepere ra e te inangaro maata maira te Atua ko Iehova iaku, ko tei akamana i tetai ua atu no tana angaanga.

Karanga a Iesu e: “E mea meitaki i te oronga atu i te rave mai.” (Angaanga 20:35) I teia tuatau, ka rauka tikai iaku i te tuatua e e mataora toku, noatu kare rava au i manako ana i te reira i mua ana, inara te kite nei au ka rauka iaku i te tauturu i tetai ke i teianei. ■

Kitea e Au Tetai Mea Meitaki Atu i te Oraanga Mekameka

AKAKITEIA E MINA HUNG GODENZI

I tetai po i te 1984, kua tau i toku turanga mei tetai mapu ou noa ua nei ki tetai tamaine rongonui. Kua akakiteia au ko Maine Hong Kong. Noku te tutu i runga i te kapi mua o te au makatini e te au nutipepa. Kua imene au, kua ura, kua oronga i te au tuatua, kua akaarii au i runga i te tivi, kua aao i te kakau manea, e kua kapiti atu ki te aronga puapinga mei te kavana o Hong Kong.

I tera mai mataiti, kua akamata au i te akatutu teata, te maata anga o te taima ko au te vaine arataki i roto i te teata. Kua inangaro te aronga tata nuti i toku tua, kua inangaro te aronga nenei i toku tutu, e kua inangaro te au tangata iaku kia tae ki te au akaariari anga mua o tetai teata, te pakoti ripene o te ngai ou, te au kaikai anga avatea e te aiai. E akarakara ua mai ana te tangata iaku.

Inara i muri mai, kua kite mai au e kare teia au mea i riro ei mea mekameka mei taku i manako ana. Naku e akatutu ana i te au tuanga maata o te au teata e e mea kino te reira. Kare o te aronga akatutu teata i Hong Kong e aronga tei takirua ia ratou mei to Hollywood rai, no reira naku e rave ana i taku uorai akarere anga patikara na runga i tetai motoka. E

Ko au e
akaoro
patikara ra i
roto i te
teata



©2010 Fortune Star Media Limited All Rights Reserved.



manganui taku au teata i akatutu ana, e au teata tau kore e te tā tangata. Tetai pae e au peu temoni to roto.

I te 1995, kua akaipoipo au i tetai tangata maani teata. Noatu te akaraanga kua rauka iaku te au mea pouroa e mataora ai au—te turanga mekameka, te apinganui, e tetai tane meitaki—kua taitaia tikai au e te maromaroa. Kua akamutu au i te akatutu teata.

AKAMAARAANGA I TOKU AKARONGO I TE TAMARIKI ANGA

Kua akamata au i te akamaaraara ma te inangaro i toku akarongo mei toku tamariki anga. I te reira tuata, kua aere maua ko toku tuakana i te au Maanakai tataki tai i te atoro i tetai ngutuare tangata Au Kite o Iehova. Kua apii kapiti te papa ko Joe McGrath, i te Pipiria kia matou e tana tamariki tamaine e toru. E ngutuare tangata oaoa e te aroa to ratou, e kua akangateitei a “Angakara Joe” i tana vaine e tana tamariki. Kua rekareka katoa au i te aru ia ratou ki ta ratou au uipaanga Kerititiano. I tetai taima kua aere matou ki te au akaputupuanga maata. E au tuatau mataora te reira. Kua kite mai au i te turanga tinamou i rotopu i te Au Kite.

Te mea tuke, kua tupu te au mea kino tikai kiaku i toku uorai ngutuare. Kua riro te oraanga o toku

papa ei akataitaia maata i toku mama, e kua tupu te taitaia kino kiaia. I toku ngauru anga mataiti, kua akamutu a Mama i te kapiti atu ki te Au Kite o Iehova. Kua aru ua atu au ma te kore e tae ana toku ngakau e kua papetitoia au i te 17 mataiti. Inara kare i roa i muri mai, kua piri atu au ki te au angaanga kare e tau ana i tetai Kerititiano e i muri akera kua akaruke au i te putuputuanga.

KUA MANAKO AU I TE OKI MAI

I muri poto ake i toku akaipoipoanga, kua atoroia mai au e tetai nga akaere o te putuputuanga a te Au Kite o Iehova. Kua akamārama mai raua e akapeea au i te oki akaou anga ki te Atua ko Iehova, e kua akanoo raua e na tetai mitinari ko Cindy e tauturu iaku. Te tae anga ki teia taime, kua ngaro te maata anga i toku akarongo, no reira kua pati au kia akapapu mai aia e ko te Pipiria tikai te Tuatua na te Atua. Kua akari mai aia i te au akaraanga o te au totou Pipiria tei akatupuia. Ma te marie, kua riro mai maua ei nga oa piri vaitata, e kua pati mai iaku kia apii i te au apiianga momua o te Pipiria kiaia. Kua āriki au i te reira. Te taime mua teia i toku āriki anga e Atua aroa a Iehova, tei inangaro tikai iaku kia mataora.

I toku akamata anga i te oki akaou ki te au uipaanga Kerititiano, kua kite mai au e kua rekareka maata atu au i te pirianga o te Au Kite i to te pirianga ki te aronga i roto i te pitinita teata. Inara kua riro te au tupuanga i toku tamariki anga ei akakeu iaku kia kore e irinaki i tetai ua atu, e kare au i reka iaku uarai. Kua tauturu tetai mema o te putuputuanga iaku na te akaari anga mai i roto i te Pipiria akapeea me rapakau i teia au manamanata i te pae o te manako ngakau, e kua apii katoa au i te akatupu i te au pirianga oa mou tikai.

TETAI MEA MEITAKI ATU I TE ORAANGA MEKAMEKA

I te 1997, kua neke maua ko taku tane ki Hollywood, California, i Marike. I reira kua piri maata atu au ki roto i te tauturu anga i te tangata kia puapingaia mei te tu pakari i roto i te Tuatua na te Atua. Na te apiianga i te Pipiria i rauka ai iaku te tu merengo maata atu i to te tu mekameka ravarai o te rave e te akatutu anga i te au teata. Ei akaraanga, i te 2002, kua aravei au ia Cheri, e oa i mua ana no Hong Kong mai. I te au tu e manganui aiteite ua to maua au tupuanga i te oraanga. Koia te Maine Hong Kong i te

mataiti i mua ake iaku. Te tika, i toku re anga i te taoonga, nana i akataoonga iaku. Kua riro katoa mai aia ei vaine akatutu teata e i muri mai kua riro mai ei vaine maani teata, te angaanga kapiti anga ki te aronga maani teata rongonui. Kua neke katoa aia ki Hollywood.

Kua tangi au ia Cheri te kite anga au e kua takake atu tona patana no te maki pukuatu. Kare roa aia i kite ana i te akapumaana anga a te akonoanga Buda. Mei iaku rai kua rauka iaia te oraanga mekameka ta tetai pae e anoano ra inara kua maromaroa aia e kare e irinaki ua atu i tetai. Kua akamata au i te akakite kiaia i taku e apii ra mei te Pipiria, inara na tana akonoanga Buda i ngata ai iaia i te āriki i te reira.

I tetai rā i te 2003, kua ringi mai a Cheri iaku mei Vancouver, Kanata, te ngai e maani ra aia i tetai teata. Ma te rekareka, kua akakite mai aia e iaia e akaoro aere ra te akara i te au ngai manea o

Toku oa ko Cheri i te ngai akatutu anga teata



te enua e ma te viviki kua akamata aia i te pure ma te reo maata: “E akakite mai kiaku, Koai te Atua mou tikai? Koai toou ingoa?” I te reira taime, kua akaoro aia na te pae i tetai Are Uipaanga Patireia e kua kite i te ingoa o Iehova. Kua manako mai aia e e pauanga teia no ko mai i te

Ko Cheri i teia rā



Atua, e kua inangaro viviki aia i te aravei i te Au Kite o Iehova. Kua rave au i te au akanoonoo anga, e i roto i nga mea rā ua, tei roto aia i tetai uipaanga a te putupuutuanga reo Tinito i Vancouver.

“E inangaro tikai to teia aronga iaku,” i akakite mai a Cheri kiaku i muri mai. “Ka rauka iaku i te akakite i toku manako kia ratou.” Kua rekareka tikai au te akarongo i te reira no te mea ia Cheri i roto i te pitiniti teata, kare ona au oa. Kua aere ua atu rai aia ki te au uipaanga. I te 2005, kua taina aia i tetai pepa korero-motu no te maani i tetai nga teata maata i Tinito, te anoano angaia aia kia oki ki Hong Kong. Ma te mataora, i te 2006, kua akatapu a Cheri i tona oraanga kia Iehova e kua papetitoia i ko i tetai akaputupuutuanga a te Au Kite i Hong Kong. Noatu e kua inangaro aia i te tavini maata atu ia Iehova, kua riro tetai au mea i roto i tana pitiniti teata ei mea ngata tikai kiaia e kare aia i mataora ana.

TE REKAREKA O TE TAUTURU ANGA I TETAI KE

I te 2009, kua tau takiri te turanga o Cheri. Kua manako aia i te akaruke i te angaanga maani teata e

rauka'i i te tavini maata atu ia Iehova. E maata tona au oa i rauka mai i roto i te putupuutuanga Kerititiano. Kua riro mai aia ei tavini tamou te tutu aere i te tuatua meitaki o te Patireia e kua reka tikai i te tauturu i te tangata kia kitea te oraanga meitaki atu.—Mataia 24:14.

E oti kua manako a Cheri i te apii i te reo Nepal ei turuturu i te pupu reo Nepal o te Au Kite e tupu ra i Hong Kong. Ka akamārama atu au no te maata anga o te au tangata Nepal i Hong Kong ka kopaeia e ka akavaavaaia no te mea kare ratou i kite i te reo Papaa e te reo Tinito e e tuke ta ratou au peu. Akakite mai a Cheri kiaku mei teaa te maata i tona rekareka i te tauturu i te reira au tangata kia mārama i te Pipiria. Ei akaraanga, i tetai ra i te aere anga mei tera ki tera are, kua aravei aia i tetai vaine Nepal e meangiti ua tana i kite no runga ia Iesu e kare ana apinga i kite no runga i te Atua mou, ko Iehova. Kua taangaanga a Cheri i te Pipiria ei akaari kiaia e kua pure a Iesu ki tona Metua i te rangi. I te kite anga teia vaine e ka rauka iaia i te pure ki te Atua mou, tona ingoa ko Iehova, kua akatuera aia i tona ngakau kia ariki i te tuatua meitaki. Kare i roa ana kua apii katoa tana tane e tana tamaine i te Pipiria.—Salamo 83:18; Luka 22:41, 42.

I toku kite anga mei teaa te maata to Cheri rekareka i te tutu tamou, kua ui au kiaku uaorai, ‘Eaa te tāpū nei iaku i te rave mei tana rai?’ Tae anga ki teia taime, te noo akaou ra au i Hong Kong. Kua manako au i te akatanotano akaou i toku oraanga kia piri maata ki te apianga atu i te tuatua mou Pipiria. Kua kite mai au e na te akarongo anga ki te tangata e te tauturu anga ia ratou kia mārama i te Tuatua na te Atua e mataora tikai ei au.

Ei akaraanga, kua rauka iaku i te apii i te Pipiria ki tetai vaine Vietnam e maromaroa ua ana aia i te maata anga o te taime e e aue ua ana. I teianei e manakonakoanga rekareka tikai tona e te rekareka ra i te kapiti atu ki te putupuutuanga.

Kua kiteaia e maua ko Cheri tetai mea meitaki maata atu i te oraanga mekameka. Noatu kua riro te angaanga maani teata ei mea reka e te rongonui, e merengo maata atu to maua i te apii i te tangata no runga i te Atua ko Iehova no te mea te riro ra te reira ei akakaka iaia. Kua kite tikai maua i te tika o ta Iesu au tuatua: “E mea meitaki i te oronga atu i te rave mai.”—Angaanga 20:35. ■



Kia Akakore ua i te Ara a Tetai Ke

KAVEINGA PIPIRIA: “E akakore tetai i ta tetai ara, e tapepeanga ta tetai ki tetai ra; mei [ia lehova] i akakore i ta kotou na, e akapera katoa kotou.”
—Kolosa 3:13.

Eaa te aiteanga o te reira? I roto i te Pipiria, kua akaaiteia te ara ki te kaiou e kua akaaiteia te tu akakore ua i te ara ki te tipu anga i tetai kaiou. (Luka 11:4) Karanga tetai puka apii e i roto i te au Tuatua Tapu, te aiteanga o te kupu Ereni tei uriia “akakore” koia oki te “akakore i te kaiou, kare e māro atu i te reira.” No reira, me iki tatou i te akakore i te ara a tetai tei akakino mai ia tatou, kare tatou e tapapa atu i tetai apinga mei te tangata tei apa. To tatou tu puareinga i te akakore ua i te ara **kare** te aiteanga e te akatika atura tatou i te tu tarevake me kore te akameangiti atura i te mamae ta te reira i akatupu kia tatou. Mari ra, ka manako ngoie ua tatou i te akaruke i te akamoupuku, noatu e “e tapepeanga” tikai ta tatou.

E tau ainei no tatou i teia tuatau? Ei au tangata apa ua, kua rave katoatoa oki tatou i te ara. (Roma 3:23) No reira, e tu pakari to tatou kia inangaro i te akakore i te ara a tetai ke, no te mea a tetai tuatau ki mua ka anoano tatou kia akakore mai tetai i ta tatou ara. Mei tera te tu, me iki tatou i te akakore i te ara a tetai ke, ka puapinga katoaia tatou uorai. Akapeea ra?

Me akamou ua tatou i te riri e te akamoupuku—e kare e akakore i te ara a tetai ke—ka tamamae tatou ia tatou uorai. Ka riro teia tu manako ngakau tau kore ei apai ke i to tatou mataora, te arairai ia tatou, e ka akakino ia tatou. E ka takino katoa i to tatou oraanga pae kopapa. I roto i tetai ripoti na te *Journal of the American College of Cardiology*, tataia e Dr. Yoichi Chida e te Poropeta no te Manako Tangata ko Andrew Steptoe, kua karanga e: “Kua kitea mai i roto i te au kimikimianga e e pirianga to te tu riririri e te makitakita ki te maki pukuatu.”

I tetai tua, ka tamanako ana i te au puapinga o te tu akakore anga i te ara. Me akakore ua tatou i te ara a tetai ke, ka akono tatou i te tu taokotai e te au, i reira te paruruanga i to tatou au pirianga. Tei puapinga rava atu, te akaari ra e e aronga aru tatou i te tu o te Atua, tei akakore ua i te ara a te aronga tei tatarara e tei tapapa ia tatou kia pera katoa.—Mareko 11:25; Ephesia 4:32; 5:1.



Te Mareka Kore ra Ainei Koe i te Atua?

“EAA ko au ei? Eaa ra te Atua i akatika ai kia tupu teia kiaku?” I tona 24 mataiti, ko teia te nga uiana anga tei tamanamanata ia Sidnei no Brazil mai. I muri ake i tetai tumatetenga i runga i te ngai tupaorooro vai, mei reira mai kua noo tamou aia ki runga i te pereoo no te pirikoki.

No te mamae tei tupu mai mei te tumatetenga, te maki, te mate o tei akaperepereia, te tumatetenga natura, e te tamaki, ka ngoie ua i te tangata kia manako mareka kore i te Atua. Kare teia i te apinga ou. Kua tukiaia te metua tane ko Iobu i te tuatau taito ki te au tumatetenga e manganui. Ma te tarevake kua akaapa aia i te Atua, te na ko anga e: “Te kapiki nei au kia koe, kare ra koe e akarongo mai iaku: te tu nei au ki runga, kare ra koe e akono mai iaku. Kua riro koe ei takinga-kino iaku: i te ririnui o te rima kua rave viviki maira koe iaku.”—Iobu 30:20, 21.

Kare a Iobu i kite i te tumu o tona au manamanata e no teaa ra te reira i tupu ei e eaa te tumu i akatika ai te reira. Ma te mataora, te akamarama maira te Pipiria kia tatou te tumu i tupu ei te reira au tumatetenga pera katoa akapeea tatou i te ariu anga atu ki te reira.

KUA AKAKORO AINEI TE ATUA I TE TANGATA KIA MAMAE?

No runga i te Atua, te akakite maira te Pipiria kia tatou: “Ko tei tika rava tana angaanga ra; ko tei tau katoa tona au aerenga; e Atua tuatua-mou, e te kino kore ra, e tuatua-tika tana, e te tiratiratu!” (Deuteronomi 32:4) Tera te tu, e apinga matauia ainei me kore e mea tau ainei no te Atua “e tuatua-tika tana, e te tiratiratu” kia akakoro i te au tangata kia mamae me kore i te taangaanga i te au tumatetenga kia akatunga me kore kia tamā ia ratou?

Tei tuke, te akakite maira te Pipiria: “Eiaa rava e tangata pikikaia e karanga e, Kua pikikaia au e te Atua: kare rava te Atua e vavare i te kino, kare rava oki aia e pikikaa i te tangata.” (Iakobo 1:13) Te tika, te apii ra tatou mei te Pipiria e kua oronga mai te Atua i tetai akamataanga tiamā e te apa kore ki te tangata. Kua oronga aia ki te nga tangata mua ko Adamu raua ko Eva tetai kainga manea, te au mea anoanoia no te ora-

anga, e te angaanga memeitaki. Tuatua maira te Atua kia raua, “Kia anau korua, e kia maata roa, e e akaki i te enua nei, e e akavi.” Kare takiri a Adamu raua ko Eva tumu kia mareka kore i te Atua.—Genese 1:28.

I teia tuatau, kare te au turanga oraanga e apa kore ana. Te tika, i te tuatua enua i aereia mai, kua kino pakari te turanga o te tangata. Tika ki teia akatutuanga: “Te ngunguru anake nei te au mea katoa i angaia mei te mamae anau ra e tae rava akenei i teiane rā.” (Roma 8:22) Eaa tei tupu?

EAA I TUPU EI TE MAMAE?

Kia marama i te tumu i tupu ei te mamae, ka tau tatou kia oki ki te taime i akamata ai te reira. Te akavare angaia raua e te angera meameaau, tei kapikiia tona ingoa i muri mai ko Satani te Tiaporo, kua kopae a Adamu raua ko Eva i te au turanga o te Atua no te mea tika e te tarevake tei akatutuia i te akaueanga auraka raua e kai i “te rakau e kite ei i te meitaki e te kino.” Kua akakite te Tiaporo kia Eva e kare raua e mate me akarongo kore raua i te Atua, i reira te akaapaanga i te Atua ei pikikaa. Kua akaapa katoa a Satani e te tāpu ra te Atua mei te au tangata te tika anga kia iki i te meitaki e te kino. (Genese 2:17; 3:1-6) Karanga a Satani e e meitaki atu te tangata me kare te Atua e tutara. Kua akatupu pouroa teia i tetai māro anga puapinga rava—Ka tau ainei te Atua kia tutara?

Kua akatupu mai te Tiaporo i tetai akaou māro anga. Kua akaapa aia i te au tangata i te tavini anga i te Atua ma te akakoro anga noinoi. No runga ia Iobu, kua tuatua te Tiaporo ki te Atua e: “Kare ainei tei koropiniia aia e koe, e tona ra are, e tana katoa ra au mea ravarai e pini ua ake? . . . Ka akatika ua atura koe i to rima i tenana, ka rave atu ei i tana e kia ope rava, kare aia e kore i te akakino ia koe ki mua i to mata.” (Iobu 1:10, 11) Noatu te tuatua ra a Satani no runga ia Iobu, te akaapa ra aia e au akakoro anga noinoi to te tangata pouroa e tavini ra i te Atua.

AKAPEEA TE ATUA TE RAPAUKU ANGA I TEIA AU MĀRO ANGA

Eaa te mataara meitaki roa atu no te rapakau i teia au māro anga puapinga e kia akaoti takiriia te reira?

Na te Atua te pauanga meitaki roa atu e te pakari —kare rava tatou e marka kore i te reira. (Roma 11:33) Kua manako aia i te tuku ua i te tangata kia tutara ia ratou uorai no tetai tuatau ei akapapu e naai te tutara anga meitaki roa atu.

Te taka ua ra te akapapu anga o te au turanga kino i te enua nei i teia tuatau e kua puapinga kore te tutara a te tangata. Kare anake te au kavamani o te ao i apai mai i te au, te tinamou, e te mataora mari ra kua akatupu katoa ratou i te takinoanga maata ki te enua. Te akapapu ra teia i te tuatua mou puapinga tei akakiteia i roto i te Pipiria: “Kare tei te tangata e aere nei, i te akono i tona uorai takainga tapuae.” (Ieremia 10:23) Na te Atua anake te tutara anga te ka akapapu i te au mutu kore, te mataora, e te puapinga ki te tangata, no te mea to te Atua akakoro anga te reira. —Isaia 45:18.

Akapeea, i reira, te Atua te akatikatika anga i te turanga o te tangata kia tau ki tona akakoro anga? E akamaara ana i ta Iesu i apii ki tana au pipi kia pure: “Kia tae toou basileia. Kia akonoia toou anoano i te enua nei, mei tei te ao katoa na.” (Mataio 6:10) Ae, kare e roa atu ana ka takore te Atua i te au mamae pouroa na roto i tona Patireia. (Daniela 2:44) Ka riro te putaua, te maki, e te mate ei au mea taito. No runga i te aronga putaua, te akakite ra te Pipiria no te Atua “ko tei putaua ra me kapiki maira, nana ia e akara.” (Salamo 72:12-14) No te aronga maki, te taputou maira te Pipiria: “Kare oki to reira e karanga

e, Kua maki au.” (Isaia 33:24) No runga katoa i te aronga tei mate e tei roto i te manako o te Atua, karanga a Iesu e: “Te vaitata mai nei oki te ora, e akarongo ei te aronga katoa i roto i te rua i tona reo, E kua aere mai ki vao.” (Ioane 5:28, 29) Mei teaa atura te pumaana i teia au taputou!

AUTUANGA I TE MANAKO MAREKA KORE

No tetai 17 mataiti i muri ake i tona tumatetenga, kua karanga a Sidnei tei taikua i te akamata anga o teia atikara e: “Kare rava au e akaapa i te Atua ko Iehova no teia tumatetenga, inara i te akamata anga kua marka kore au iaia. Te vaira te au rā ka maromaroa au, e ka aue me akamanako au i toku turanga pakipakitai. Inara, na roto i te Pipiria i mārama ai au kare teia tumatetenga i te akautunga anga na te Atua. Mei ta te Pipiria e karanga ra, ‘e tuatau ra, e te manuia ua, to te tangata katoa ra.’ Kua riro te pure kia Iehova pera katoa te tatauanga i te au irava tau tikai ei akaketaketa iaku i te pae vaerua e kia maroiroi ua.” —Kohela 9:11; Salamo 145:18; 2 Korinetia 4:8, 9, 16.

Na te akamanako anga i te au tumu i akatika ai te Atua i te mamae kia tupu e akapeea te reira me takoreia kare e roa atu ana, ka tauturu ia tatou kia autu i tetai ua atu manako marka kore i te Atua. Te akapapua maira tatou e ko te Atua “koia tei tutaki mai i te aronga i kimi tikai iaia.” Ko tei akarongo iaia ra e tana Tamaiti kare anake ia e akama.—Ebera 11:6; Roma 10:11. ■



Me patu i te akarongo
i roto i te au taputou
a te Atua ka autu tatou
i te manako marka
kore iaia



EAA TE PIPIRIA I AKATUTU EI I TE AU TUPUANGA I TEIA TUATAU?—LUKA 21:10, 11.

No teaa ra i tataia ai te au totou i roto i te Pipiria?

E manganui te au totou taka meitaki i roto i te Pipiria. Kare e rauka i tetai tangata i te totou mai i te tuatau ki mua ma te taka meitaki. No reira, te oronga maira te akatupu anga o te au totou Pipiria i te tumu anga papu e e Tuatua na te Atua te Pipiria.—E tataua ia Iosua 23:14; 2 Petero 1:20, 21.

Te riro ra te au totou Pipiria tei akatupuia ei akapapu i to tatou akarongo ki roto i te Atua. (Ebera 11:1) Te akapapu katoa maira e ka riro te au taputou a te Atua no te tuatau ki mua ei mea tika. No reira, te riro ra te totou Pipiria ei manakonakoanga papu no tatou.—E tataua ia Salamo 37:29; Roma 15:4.



No tetai akakiteanga maata atu, akara i te pene 2 o teia puka, neneiia e te Au Kite o lehova

Ka rauka i te kopi mai mei runga i te www.jw.org

Akapeea te au totou Pipiria i te tauturu anga ia tatou?

Te akamatakite maira tetai au totou i te au tavini o te Atua kia matakite. Ei akaraanga, te kite anga te au Kerititiano o te anere mataiti mua i tetai au totou i te akatupu angaia, kua akaruke ratou ia Ierusalem. I muri mai, te takore angaia taua oire ra no tei kopae te maata anga o te tangata ia Iesu, kua mamao ke ana te au Kerititiano i te ngai paruruia.—E tataua ia Luka 21:20-22.

I teia tuatau, te akaari maira te au totou akatupuia e kare e roa atu ana ka takore te Patireia o te Atua i te au patireia e te au kavamani tangata. (Daniela 2:44; Luka 21:31) No reira e mea rapurapu kia matakite te tangata tatakai tai i teianeia kia rauka te mareka anga a te Ariki, ko Iesu Karaiti, tei akataoongaia e te Atua.—E tataua ia Luka 21:34-36.

Tuku mai i te puka
Eaa Tikai ta te Pipiria e Apii Maira?

REO _____


INGOA _____


NGAI NOOANGA _____

Akara i te kapi 2 no te ngai nooanga

TATAU I TE AU PAUANGA NO TETAU ATU
AU UIANGA PIPIRIA I RUNGA I TE INITANETI



 Kare e tutaki me kopi i teia makatini e te au makatini taito

 Ka rauka te Pipiria i runga i te Initaneti i roto i te 100 reo

Aere ki te www.jw.org, me kore scan i teia code

